



Երիտասարդ Պատմագետների Ասոցիացիա ՀԿ



Edu Armenia Նախաձեռնություն

Ուսուցիչների պետական պարտադիր վերապատրաստման դասընթաց 2022

Հետազոտական աշխատանք

Թեմա՝ Սովորողի արժեհամակարգի ձևավորումը
«Գրականություն» առարկայի դասավանդման ընթացքում

Հետազոտող ուսուցիչ՝ Ազատյան Գայանե

Բովանդակություն

Ներածություն	3
Գլուխ I. Սովորողների արժեհամակարգի ձևավորումը	4
Գլուխ II. «Գրականություն» առարկայի դերը սովորողի արժեհամակարգի ձևավորման գործում	7
2.1. Ժամանակակից մեթոդների կիրառումը գրականության դասին	8
2.2. Գրական ցերեկույթները և միջոցառումները՝ որպես սովորողի արժեհամակարգի ձևավորման մաս	12
2.3. Այցելություններ թանգարաններ, դրանց դերը սովորողի արժեհամակարգի ձևավորման գործում	13
2.4. Հայրենաճանաչ էքսկուրսիաները սովորողի արժեհամակարգի կարևորագույն մաս	14
Եզրակացություն	17
Օգտագործած գրականության ցանկ	18

Ներածություն

Յուրաքանչյուր ուսուցիչ իր աշխատանքային գործունեության ընթացքում հանդիպում է տարբեր խնդիրների, հայտնվում տարբեր իրավիճակներում, որոնք անմիջականորեն անդրադառնում են իր ուսուցչական աշխատանքի վրա: Հետագոտող ուսուցիչը կարողանում է վերլուծել տվյալ պահը, իրավիճակը, խորամուխ լինել ծագած խնդիրների մեջ և գտնել համապատասխան լուծումներ:

Հետագոտության միջոցով ուսուցիչը կարող է հասնել ցանկալի արդյունքի՝ հաղթահարելով ծագած խնդիրները: Այդ ճանապարհին, իհարկե, կլինեն նոր և հետաքրքիր բացահայտումներ, որոնք կնպաստեն ուսուցչի կատարելագործմանը և արդյունավետ աշխատանքին:

Իմ աշխատանքային գործունեության ընթացքում (19 տարի) ես նույնպես հանդիպել եմ բազմաթիվ խնդիրների, որոնք փորձել եմ հնարավորինս հաղթահարել: Ունեցել եմ դժվար խոսող, դժվար շփվող, բարդույթներ ունեցող, ինքնամիովի, նյարդային տարբեր խնդիրներ ունեցող, սովորել չցանկացող, վարքային տարբեր շեղումներ ունեցող աշակերտներ: Նրանց կողքին սովորել են նաև ակտիվ և կրթության հանդեպ մեծ սեր ունեցող աշակերտներ: Կրթական գործընթացում մշտապես կարևոր և առաջնային եմ համարել, սովորողի արժեհամակարգի ձևավորումը, որովհետև ուսուցիչը կերտում է իր հայրենիքի, ազգի, ընտանիքի, շրջապատող միջավայրի համար հայեցի դաստիարակություն, ազգային գիտակցություն ունեցող, բանիմաց անհատ, որը կրում է նաև համամարդկային արժեքներ:

Հետագոտության տվյալների հավաքագրումը կատարել եմ Անտիկյան կրթարանի 5-9-րդ դասարաններում (60 աշակերտ):

Սովորողի արժեհամակարգի ձևավորման վերաբերյալ հետագոտությունը կատարել եմ սիրով: Աշխատանքային գործունեության մոտ 20 տարիների ընթացքում ևս կարևոր եմ համարել աշակերտ-անհատի ձևավորումը, ով իր մեջ կկրի բարձր որակներ:

Այս հետագոտական աշխատանքի միջոցով կներկայացնեմ տարբեր հնարավոր միջոցներ, ճանապարհներ, որոնք «Գրականություն» առարկայի միջոցով կձևավորեն սովորողի արժեհամակարգը:

Սովորողի արժեհամակարգի ձևավորումը պետք է լինի ժամանակակից դպրոցի գերխնդիրը: Այն մշտապես պետք է լինի բոլոր ծնողների և մանկավարժների ուշադրության կենտրոնում:

Գլուխ I. Սովորողների արժեհամակարգի ձևավորումը

Արժեհամակարգը յուրաքանչյուրի հոգևոր, իմացական, բարոյական, գեղագիտական, մշակութային, էթնիկական արժեքների ամբողջությունն է, որը նպաստում է անձի բազմակողմանի և ներդաշնակ ձևավորմանը: Արժեքային կողմնորոշիչների համակարգը պետք է ներդաշնակ լինի. այն մարդու կենսական աշխարհն է, աշխարհի պատկերն իր ընկալմամբ:

Արժեքները մարդկանց գիտակցության մեջ դիրքորոշումների ձևավորման և պահպանման հիմքն են: Դրանք օգնում են մարդուն կոնկրետ դիրք գրավել, արտահայտել իր տեսակետը, տալ գնահատական: Մարդու վարքը և գործունեությունը բացահայտում են այն արժեքները, որոնք նա կրում է:

Արժեհամակարգի ձևավորման գործում հանրակրթության մեջ կարևոր դեր ունեն ուսումնական բոլոր առարկաները: Կարծում եմ այդ առարկաներից անգնահատելի դեր ունի «Գրականություն» առարկան:

Սույն աշխատանքում ներկայացված են այն վարկածները, որոնց օգնությամբ կարելի է լուծել հետազոտական աշխատանքի խնդիրը՝ ինչպես ձևավորել սովորողի արժեհամակարգը «Գրականություն» առարկայի դասավանդման գործընթացում.

- ❖ Դասապրոցեսի ընթացքում բարոյահոգեբանական, մանկավարժական ճիշտ մոտեցմամբ ներկայացնել գրական կերպարներին: Բազմակողմանի վերլուծության հնարավորություն տալ աշակերտներին, որպեսզի զգան և ճանաչեն իրավիճակը և գործող անձանց:
- ❖ Ժամանակակից տարբեր մեթոդների կիրառմամբ նպաստել աշակերտների մտքերի ազատ արտահայտմանը, թույլ տալ ինքնուրույն վերլուծել և մտածել թեմայի վերաբերյալ:
- ❖ Ձևավորել ճաշակ և նոր գիտելիքներ հաղորդել գրական ցերեկույթների և տարաբնույթ միջոցառումների միջոցով:
- ❖ Այցելություններ թանգարաններ և տարբեր տեսարժան վայրեր:

Սովորողի արժեքային կողմնորոշիչների համակարգի մոդելի համաձայն՝ առանձնացվում է 3 հիմնական գործընթաց՝ ադապտացիա, սոցիալականացում և անհատականացում [Տ. Ազատյան, Զ. Բաբայան «Անչափահաս իրավախախտի հոգեբանություն», էջ 61]: Խնդրի լուծման համար անպայմանորեն սրանց պետք է ավելանան նաև արժեհամակարգի ձևավորման մի շարք օբյեկտիվ և սուբյեկտիվ գործոններ:

- ❖ Օբյեկտիվ գործոններ՝ ընտանիք, դպրոց, միջավայր, հասարակական երևույթներ և այլն:
- ❖ Սուբյեկտիվ գործոններ՝ հուզականություն, հուզական դիրքորոշում, վերաբերմունք, բարոյագիտակցություն, իրավագիտակցություն, միջանձնային հարաբերություններ և այլն:

Նշված գործոններից հարկ եմ համարում առանձնացնել հատկապես դպրոցի և ընտանիքի դերը, որովհետև թե՛ մեկը, թե՛ մյուսը պատկանում են անփոխարինելի արժեքների թվին:

Ընտանիքն այն առաջնային սոցիալական հիմքն է, որը ձևավորում է անձնավորության բարոյական և հոգեկան կերտվածքը [Տ. Ազատյան, Յ. Բաբայան «Անչափահաս իրավախախտի հոգեբանություն» Էջ 63]: Ընտանիքը կարևորագույն նշանակություն ունի երեխայի անձի ձևավորման և զարգացման գործում: Երեխայի հետագա կյանքը, ճակատագիրը, դիրքորոշումը շրջապատողների և սեփական անձի նկատմամբ կախված է ընտանիքում ստեղծված բարոյահոգեբանական մթնոլորտից: Ընտանիքում երեխան հաղորդակցվում է կյանքի հետ, այդտեղ է դրվում աշխարհընկալման հասկացման հիմքերը: Երեխան ընտանիքում է սկսում յուրացնել բարոյական արժեքներ, սոցիալական նորմեր, հասարակական, մշակութային ավանդույթներ, դիրքորոշումներ: Երեխայի արժեհամակարգի ձևավորման գործում հավասարապես կարևոր է ծնողներից յուրաքանչյուրի դիրքորոշումը կյանքի, մարդկանց, շրջապատող աշխարհի և այլնի հանդեպ: Երեխայի հոգեկան և անձնային զարգացումը ձևավորվում է հենց այստեղ:

Ընդունելով այս ամենը՝ պետք է ասել, որ սովորողների արժեքների ձևավորման հարցում չափազանց կարևոր տեղ ունի ուսումնական հաստատությունը, որտեղ էլ ուսումնադաստիարակչական գործընթացի միջոցով կարգավորվում են այս խնդրին վերաբերող տարբեր հարցեր: Ուսուցման դաստիարակչական ներգործությունը օբյեկտիվ օրինաչափություն է, որովհետև աշակերտների համար ուսուցումը գործունեության հիմնական տեսակն է, դրա համար էլ այն կարևոր դեր է կատարում անձի ձևավորման գործում [Բաբանսկի Յու. Կ. , Պոբեդանոսցև Գ. Ա. , «Աշակերտների դաստիարակությանը կոմպլեքսային մոտեցում», Էջ 12]:

Երեխաների արժեքների ձևավորման գործում մանկավարժների դերն անչափ կարևոր է:

Չետագոտության ընթացքում հատկապես հետաքրքիր է ուսումնասիրել դեռահասների արժեհամակարգի ձևավորումը: Դեռահասի հոգևոր աշխարհի մասին կարելի է դատել այն բանից, թե ինչ նպատակների հասնելու համար է իր ջանքերն ուղղում, ինչն է նրա համար առավել կարևոր, ինչ հետաքրքրություններ և պահանջմունքներ ունի, հոգևոր զարգացման ինչ մակարդակի վրա է:

Այս ամենից էլ հենց կախված է մեր հասարակության ուղին և զարգացումը: Ուստի ես՝ որպես գրականության ուսուցչուհի, իմ պարտքն եմ համարում գրականության դասավանդան միջոցով կերտել այնպիսի անհատ, ով կունենա ազնիվ մղումներ, ազատ կամք, կլինի ազգասեր և հայրենասեր, արդարամիտ և կրթված, բարձր կգնահատի մադկային հարաբերությունները և կունենա միայն բարձր որակներ:

Գլուխ II. «Գրականություն» առարկայի դերը սովորողի արժեհամակարգի ձևավորման գործում

Սովորողի դաստիարակության գործընթացն այսօր ընթանում է բազմաթիվ հանգամանքների ազդեցության ներքո: Դրանք են՝ ընտանեկան, կրթական, սոցիալական, ազգային, մշակութային, հասարակական և այլն:

Հատկապես այս օրերին կարևոր է, որ ժամանակակից մանկավարժությունն իր առջև խնդիր դնի բարձրացնել սովորողների ազգային գիտակցության ձևավորումը սեփական ժողովրդի պատմության և մշակույթի հենքի վրա: Իհարկե, անհրաժեշտ է չանտեսել նաև համամարդկային արժեքները: Ընդհանրապես աշակերտն այս ամենի արդյունքում հաղորդակցվում է հասարակական մշակույթին և ձևավորվում իբրև անհատականություն:

Կրթական տարբեր աստիճաններում աշակերտն ունենում է աշխարհի իր ընկալումը: Սովորողի արժեքային կողմնորոշումները, արժեքային նախապատվությունները, բարոյահոգեբանական գծերն ու վարքը դրսևորվում են՝ ելնելով տարիքային առանձնահատկություններից:

Արտաքուստ արժեհամակարգային դաստիարակությունը դրսևորվում է աշակերտի շփման և վարքի որոշակի մակարդակում, այսինքն՝ արտաքին տեսքում, խոսքում, ազատ ժամանակն անցկացնելու ձևում, նրանց ապրելակերպում:

Սովորողի արժեքների ձևավորման վրա ազդում են նաև միջանձնային հարաբերությունները կամ յուրաքանչյուրի համար հեղինակավոր մարդկանց (ծնող, ուսուցիչ, ընկեր, քույր կամ եղբայր և այլն) հետ շփումները: Աշակերտի համար հեղինակավոր անձ կարող է լինել նաև դպրոցի տնօրենը, դասուցիչը, ուսուցիչը: Աշակերտը իր համար հեղինակավոր մարդուց կարող է վերցնել ինչպես դրական, այնպես էլ բացասական օրինակներ: Ընդ որում՝ դպրոցահասակ երեխան բացասական ավելի հեշտ է վերցնում, քան դրականը, ինչը կարող է անդառնալի հետևանք ունենալ անձի արժեհամակարգի ձևավորման վրա: Հետևաբար մանկավարժական լուրջ վերահսկողություն է անհրաժեշտ: Ուսուցիչը հնարավորություն ունի առարկայական ծրագրերի յուրացման միջոցով աշակերտների մեջ սերմանել բարոյական, գեղագիտական, դաստիարակչական, մշակութային ազգային և այլ շատ արժեքներ, գիտելիքներ, վերաբերմունք:

Սովորողի արժեհամակարգի ձևավորման գործում բացառիկ տեղ ունի «Գրականություն» առարկան: Այն սերունդ դաստիարակելու, մարդկային բարձր որակներով նրանց զինելու, հոգևոր արժեքներ ճանաչելու և գնահատելու, գեղագիտական ճաշակ ձևավորելու գործում անգնահատելի դեր ունի:

Դպրոցականների դաստիարակությանը բնորոշ է հակումը դեպի մշակույթի որոշակի շերտեր, կենցաղին բնորոշ արժեքների աստիճանակարգում: Այստեղ շատ կարևոր է ուսուցչի դերը: Անհրաժեշտ է աշակերտների մեջ ձևավորել կյանքի նկատմամբ դրական վերաբերմունք, ապրած յուրաքանչյուր օրվա համար ուրախության զգացում, ապրելու ունակություն:

Ըստ իրենց տարիքային, սեռային և անհատական առանձնահատկությունների՝ աշակերտները հակված են նույնացնել իրենց այս կամ այն կերպարի հետ՝ յուրացնելով նրանց ապրելակերպը, հագուստը, կյանքի հանդեպ վերաբերմունքը, վարքը և այլն:

Առանձնացնենք մի քանի տարբերակներ, որոնք կիրառում են «Գրականություն» առարկայի դասավանդման ընթացքում:

2.1. Ժամանակակից մեթոդների կիրառումը գրականության դասին

Կրթության բովանդակության հետ միասին ուսուցման մեթոդներն օգնում են աշակերտին ստացած գիտելիքները կյանքում նպատակային օգտագործելու համար:

Ուսուցման գործընթացում լուծվում են սովորողների կրթական, դաստիարակչական տարբեր խնդիրներ: Յուրաքանչյուր դասի ընթացքում հաշվի են առնում ոչ թե մեկուսացած կամ առանձին մոտեցում, այլ գիտելիքների և կարողությունների, կամքի, բնավորության, զգացմունքների, արժեքային որակների, ինչպես նաև հոգեբանական տարբեր դրսևորումների միաժամանակյա և փոխկապակցված մոտեցում:

Գրականության դասավանդման ընթացքում առարկայական ծրագրերից առանձնացնում են ընդհանուր դաստիարակչական խնդիրներ: Ընտրում են թեմային առավել հարմար մեթոդներ, որոնց միջոցով առավելագույնս կկարողանամ նպաստել աշակերտի արժեհամակարգի կերտմանը:

Եթե աշակերտը անհատական աշխատանքում կարողանում է ցույց տալ իր ինտելեկտուալ պատրաստվածությունը, ապա *խմբային աշխատանքի* ժամանակ աշակերտները սովորում են ուշադրությամբ վերաբերվել միմյանց, միասին հաղթահարել դժվարությունները, միասին ձեռք բերել հաջողություններ, լսել և ընդօրինակել միմյանց: Ընկերների հետ աշխատելիս աշակերտն ավելի ազատ է արտահայտում մտքերը և դատողությունները, անկաշկանդ է, ինչը թույլ է տալիս ավելի արդյունավետ դարձնել դասը: Այս ամենը թույլ է տալիս ավելի հեշտ նկատել դեռահասների առանձնահատուկ զգացմունքայնությունը, նրանց ինքնահաստատվելու և հասուն երևալու ձգտումը: Այստեղ պետք է լինել ավելի նրբանկատ, ուշադիր և համբերատար:

Հետազոտության ընթացքում կիրառելով ուսուցման տարբեր ժամանակակից մեթոդներ՝ փորձել եմ ավելի ճիշտ ընկալել աշակերտներին, հասկանալ նրանց և փորձել կերտել նրանց մեջ բարձր որակներով անհատների:

Համագործակցային մեթոդներից ներկայացնում եմ հետևյալ օրինակը.

«Աշխատանք կենտրոններով»

Այս մեթոդը կիրառեցի 7-րդ դասարանում: Այն շատ տպավորիչ է, և հետաքրքրված էին բոլորը: Գրականության դասին Ե. Չարենցի կյանքը և ստեղծագործություններն էինք քննարկում: Ըստ մեթոդի՝ ունեինք 4 կենտրոն.

- ❖ Բացահայտողների կենտրոն - Աշակերտներից երկուսը ներկայացրին Չարենցի կյանքին վերաբերող կարճ գեկույց: Պատմեցին գրողի ծննդավայրից, ընտանիքից, կրթությունից, ստեղծագործական կյանքից:
- ❖ Հետազոտողների կենտրոն - Աշակերտները լրացուցիչ գրականությունից ներկայացրին հետաքրքիր փաստեր գրողի կյանքից:
Պետք է նշել, որ այս խմբում ընդգրկել էի միայն տղաների, ովքեր զարմանալի ձևով հետաքրքրված էին առաջադրանքով և Չարենցի կյանքով: Ներկայացված նյութերը նաև վերլուծեցին՝ արտահայտելով իրենց վերաբերմունքը:
- ❖ Ստեղծագործողների կենտրոն - Այս խմբի աշակերտները ներկայացրին 4 բուսական դերախաղ, որտեղ ներկա էին Չարենցը, կինը, ընկերները:
- ❖ Գրավոր աշխատանքների կենտրոն - Այս խմբի սովորողներն առանձնացրել էին շուրջ 50 բառ և արտահայտություն, որոնք գործածել էին նախորդ խմբերը:

Այս մեթոդով անցկացրած դասի ավարտին ամենատպավորիչն այն էր, որ աշակերտները զանգը հնչելուց հետո անգամ շարունակում էին քննարկել և վերլուծել առանձին դրվագներ գրողի կյանքից:

Վստահաբար կարող եմ ասել, որ դասն արդյունավետ էր և ընդամենը 12 տարեկան սովորողի արժեհամակարգում շատ կարևոր դեր ունեցավ: Կարողացան ընկալել գրողի ապրած ժամանակաշրջանը, քննադատեցին տարբեր արատավոր երևույթներ, խոսեցին ազգասիրությունից և մարդկային ազնիվ մղումներից:

Հաջորդ մեթոդով հետազոտությունը կրկին 7-րդ դասարանում անցկացրի:

«Հերոսի ուղին գծագրի տեսքով»

Աշակերտները Դ. Դեմիրճյանի «Ավելորդը» պատմվածքից Հաճի Աղայի կերպարն էին ընտրել: Ըստ աշակերտների տպավորիչ էր այն ուղին, որով անցել էր Հաճի աղան: Կերպարի բոլոր գծերը քննարկեցին, ինչի արդյունքում պատկեր շատ անսպասելի էր, բայց նաև՝ հետաքրքիր:

Գտնվեցին աշակերտները (2 աշակերտ), ովքեր արդարացևում էին Հաճի աղայի քայլերը: Մյուսներն ընդդիմացան և ամեն կերպ փորձում էին ապացուցել, որ կերպարը բացարձակապես բացասական է: Քննակումը բուռն ստացվեց, ինչը նույնպես նրանց համար որոշակի արժեքների ձեռքբերման հնարավորություն էր:

Այստեղ հենց թերևս պարզ երևաց դեռահասների խառնվածքի, վարքի, հայացքների, իդեալների բազմազան ձևեր:

Հետաքրքիր էր նաև «Արևելյան շուկա-գաղափարների շուկա» մեթոդը:

Այս մեթոդը կիրառել են հատուկ այն նպատակով, որ 5-9-րդ դասարանների աշակերտները «Մայրենի» և «Գրականություն» առարկաների դասապրոցեսի ընթացքում ներկայացնեն ինդրի լուծման իրենց տարբերակները: Այն շատ արդյունավետ էր նաև ավելի լավ ճանաչելու սովորողների գաղափարները, նրանց աշխարհընկալումը, թե ինչ հոգևոր, մշակութային, ազգային արժեքների կրող են նրանք:

Ներկայացնեմ այս մեթոդի կիրառման մեկ օրինակ:

Ինչպես աշակերտի բառապաշարից հանել օտարալեզու և ժարգոնային բառերը

Հարցման մասնակից	Դասարան	Նախընտրած առարկա	Ինդրի լուծման առաջարկ
Մարի	5-րդ	Մայրենի, անգլերեն	Շատ ընթերցել, հետևել ուսուցչի խոսքին
Նարե	5-րդ	Մայրենի	Շատ ընթերցել, հետևել ուսուցչի ուղղումներին, հաճախել թատրոն
Էդուարդ	5-րդ	Չունի նախընտրած առարկա	Կարելի է խոսել նաև ժարգոնային բառերով
Անահիտ	5-րդ	Մայրենի, կերպարվեստ	Շատ ընթերցել, հետևել ուսուցչի խորհուրդներին
Վահե	6-րդ	Մաթեմատիկա, անգլերեն	Դիտել ուսուցողական հաղորդումներ
Սևակ	6-րդ	Բոլոր առարկաները	Շատ ընթերցել և լավ սովորել մայրենի լեզուն

Արթուր	6-րդ	Ռուսաց լեզու, անգլերեն	Կարելի է նաև գրական չիտել
Արամ	6-րդ	Գրականություն, անգլերեն	Շատ ընթերցել, հաճախ այցելել թատրոն, մասնակցել գրական ցերեկույթների
Դիանա	6-րդ	Մայրենի	Ընթերցել հայ և արտասահմանյան գրականություն
Էլեն	7-րդ	Գրականություն, ռուսաց լեզու	Շատ ընթերցել, հետևել հայերենի ուղղախոսական կանոններին
Գագիկ	7-րդ	Բոլոր առարկաները	Շատ ընթերցել, դիտել հայալեզու ֆիլմեր
Էվելինա	7-րդ	Հայոց լեզու, գրականություն, պատմություն	Ընթերցել
Ալեքս	7-րդ	Աշխարհագրություն, պատմություն, գրականություն	Ընթերցել, առօրյա խոսքում հետևել ընտրած բառերին
Ռաֆայել	8-րդ	Չուկի նախընտրած առարկաներ	Խոսել այնպես, ինչպես ստացվում է
Մարի	8-րդ	Գրականություն, անգլերեն, ռուսերեն	Շատ ընթերցել
Էլեն	9-րդ	Բոլոր առարկաները	Հետևել ուղղախոսական կանոններին, շատ կարդալ, մասնակցել տարբեր գրական միջոցառումների

Մեթոդը կիրառելու համար ընտրել են այսպիսի հարցադրում՝ կարևորելով հանրակրթական հիմնական ծրագրերի ուսումնառության ակնկալվող վերջնարդյունքներում տեղ գտած լեզվական գրագիտության կարողունակությունը: «Սովորողները տիրապետում են հայոց լեզվի, գրավոր և բանավոր կերպով գրագետ հաղորդակցվում են մայրենի լեզվով և այլ օտար լեզուներով՝ ըստ լեզվական կանոնների և իրավիճակների: Նրանք կիրառում են լեզուն՝ որպես ուսումնառության և հասարակական

կյանքին մասնակցության համապիտանի գործիք: Ընդհանուր գրագիտությունը կազմում է սովորելու և լեզվական հաղորդակցության հիմքը... Սովորողները ընդունակ են բանավոր և գրավոր ձևով ճանաչել, ըմբռնել, արտահայտել, ստեղծել և մեկնաբանել տարբեր հայեցակարգեր, փաստեր, կարծիքներ» [ՀՊԶ]:

Այսպիսով՝ գրականության և մայրենիի դասապրոցեսի բազմաթիվ մեթոդների ճկուն և նպատակային կիրառումը մեծ ազդեցություն է թողնում սովորողի արժեհամակարգի ձևավորման գործում:

2.2. Գրական ցերեկույթները և միջոցառումները՝ որպես սովորողի արժեհամակարգի ձևավորման մաս

Գրական ցերեկույթները և միջոցառումները գրականության ուսուցչի աշխատանքի անբաժանելի մասն են կազմում: «Գրականություն» առարկայի դասավանդման կարևորագույն խնդիրներից է սովորողի արժեհամակարգի ձևավորումը: Ուստի նրա արժեքային համակարգը անպայմանորեն փոփոխության է ենթարկվում միջոցառումների արդյունքում:

Հաճախ ենք դասարանում հանդիպում այնպիսի աշակերտների, ովքեր առաջին հայացքից թվում է, թե անտարբեր են գրական, մշակութային որևէ նախաձեռնության հանդեպ: Սակայն պետք է նշեմ, որ այդ նույն աշակերտը կարող է ակտիվորեն մասնակցել գրական միջոցառումներին: Փորձը ցույց է տալիս, որ նման աշակերտների ներգրավվածությունը միջոցառումներին, նրա արժեհամակարգում ստեղծում է բազմաթիվ նոր և բարձր որակներ:

Միջոցառումների նյութը, բովանդակությունը, վեր հանվող թեմաները, դահլիճի կամ դասասենյակի կահավորումը, երաժշտության, հագուստի ընտրությունը, նախապատրաստական բոլոր աշխատանքները աշակերտների համար ունենում են դաստիարակչական մեծ նշանակություն:

Սովորաբար ես փորձում եմ այս աշխատանքը կատարելիս աշակերտներին ևս մասնակից դարձնել: Այդպիսով նրանք տեսնում և զգում են՝ ինչն է ավելի գեղեցիկ, ավելի հարմար, ավելի բովանդակալից և ներկայանալի, ավելի ճաշակով և նպատակային ընտրված: Ամեն մանրուք այստեղ կարևոր է՝ որակյալ աշխատանք կատարելու համար: Երբ աշակերտը տեսնում է այդ ամենը, անշուշտ ինքն էլ ձգտում է ավելիին:

Այն նույն աշակերտը, որ թվում էր՝ անտարբեր է, պետք է խանդավառվի ուսուցչի կատարած աշխատանքից և ձգտի լավագույնին: Երբ ուսուցիչը կարևորում է յուրաքանչյուր աշակերտի, նրա կատարած աշխատանքը, աշակերտն անում է

անհնարինը, որպեսզի հակառակ կարծիք չստեղծվի: Մենք ուսուցիչներս դառնում ենք սովորողի արժեհամակարգի կերտման կարևոր դերակատարը:

Այստեղ կարող եմ բերել իմ անցկացրած վերջին գրական ցերեկույթի օրինակը՝ «Մեծ Կարսեցին»: Եղիշե Չարենցի մասին պատմող այս ցերեկույթն այնքան տպավորիչ էր երեխաների համար, որ իրենք էին արդեն անում նոր և հետաքրքիր առաջարկներ: Շատ կարևոր էր, որ աշակերտներն ամբողջությամբ ընկալել էին այն, ինչ անում էին, որ միջոցառման նյութից բացի սովորում էին բազմաթիվ բանաստեղծություններ և ընթերցում մեծ գրողի մասին պատմող տարբեր նյութեր: Այսինքն՝ սովորողը ընկալել է ժամանակաշրջանը, ընկալել է գրողի հայացքները, ստեղծագործությունները, կարողացել է յուրացնել ու նաև սիրել այդ ամենը, ինչի արդյունքում էլ իր կերպարով հիացրել է հանդիսատեսին:

Վստահ կարող եմ ասել, որ այս ամենն ազդել է սովորողի արժեհամակարգի վրա: Աշակերտներից ոմանք գրականության աշխարհում գտնում են իրենց, սկսում վերլուծել սեփական քայլերը, աշխարհն ընկալել այլ կերպ, իրենց համար ձեռք բերել նոր արժեքներ և նոր որակներ:

2.3. Այցելություններ թանգարաններ, դրանց դերը սովորողի արժեհամակարգի ձևավորման գործում

Ինչ տարիքում էլ լինենք, կարծում եմ՝ կարևոր են այցելությունները թանգարաններ: «Գրականություն» առարկայի դասավանդման գործընթացում չենք կարող չանդրադառնալ այդ այցելություններին, որոնք նույնպես ազդում են սովորողի արժեհամակարգի ձևավորման վրա:

Այստեղ անհրաժեշտ է դիտարկել սովորողների մշակութային կարողունակությունները և դրանց դերը արժեհամակարգի ձևավորման գործում:

«Մշակութային կարողունակություն. սովորողները ճանաչում են հայ մշակույթն ու մարդկային քաղաքակրթությունների մշակութային բաղադրիչները՝ որպես մարդկային զգացմունքների և գործողությունների կողմնորոշիչներ: Նրանք արժևորում են սեփական ինքնությունը, ընտանիքի, համայնքի և պետության դերը, ունեն Յայաստանի աշխարհագրության, հասարակական-քաղաքական համակարգի և պատմության հիմնարար իմացություն: Աշակերտները ձևավորում են սեփական նախասիրություններ, ազգային և համաշխարհային մշակութային ժամանակաշրջանների ուսումնասիրության ընթացքում: Նրանք ի վիճակի են զարգացնել սեփական մշակութային ու գեղագիտական

պատկերացումները՝ արժևորելով հոգևոր և նյութական ժառանգությունն ու մշակութային բազմազանությունը, ճանաչելով հայ և համաշխարհային գրականությունն ու արվեստը և ձևավորելու մշակութային գրագիտություն և ճաշակ» [ՅՊԶ]:

Արժեհամակարգի մեջ կուտակված է անցյալի փորձը, որը աշակերտի մեջ ձևավորում է հայրենասիրություն, սեփական ժողովրդի պատմության, նրա ստեղծած մշակութային արժեքների, գիտական նվաճումների համար հպարտության զգացում:

Պետք է նշել, որ կարևոր է ոչ միայն հայ գրողների կամ մշակութային գործիչների թանգարաններ այցելելը, նաև համաշխարհային մշակույթի ներկայացուցիչների:

Գրականության յուրաքանչյուր ուսուցիչ պետք է փորձի հնարավորինս շատ կազմակերպել թանգարանային այցեր՝ այդպիսով ընդլայնելով սովորողի աշխարհայցը: Յուրաքանչյուր այցից սովորողը նոր արժեքներ կվերցնի իր համար, կտեսնի և կզգա գրականության ուժը մարդկային մտքի և հոգու վրա: Թե՛ գրողների, թե՛ նկարիչների, թե՛ երաժիշտների, թե՛ մշակութային այլ գործիչների հատկապես տուն-թանգարանները փայլուն ներգործում են սովորողի ինքնաճանաչողական, հոգևոր և մշակութային, ազգային արժեքների վրա:

Դպրոցական դասագրքերի նյութը կամ տեսաֆիլմերը, ուսուցչի պատմածը որքան էլ հետաքրքիր լինեն, միևնույնն է, թանգարանում գտնվելը, տեղում լսել որևէ հանճարի մասին բոլորովին այլ տպավորություն է թողնում աշակերտի վրա: Այն շունչը, որը նա զգում է թանգարանում, կարող է հիմնովին փոխել նրա վերաբերմունքը կյանքի տարբեր երևույթների հանդեպ:

Թանգարանում հաճախ աշակերտները չեն կարողանում իրենց ճիշտ դրսևորել: Թանգարան (ինչպես նաև գրադարան, թատրոն) այցելելու մշակույթը երեխան պետք է սովորի վաղ տարիքից: Այդ հարցում պետք է ակտիվ լինի թե՛ ծնողը, թե՛ ուսուցիչը:

Նշանավոր մարդկանց տուն-թանգարաններ այցելելիս աշակերտները հաճախ այնքան են ոգեշնչվում, որ իրենց մի պահ զգում են նրա ժամանակակիցը, ընկերը, բարեկամը, հյուրը այդ տանը: Այս ամենը, անշուշտ, իր դրական հետևանքներն է թողնում սովորողի արժեհամակարգի ձևավորման վրա:

2.4. Հայրենաճանաչ էքսկուրսիաները՝ սովորողի

արժեհամակարգի կարևորագույն մաս

«Գրականություն» առարկայի դասավանդման կարևոր խնդիրներից է հայրենաճանաչությունը, ինչը սովորողի արժեհամակարգի ձևավորման ևս մեկ կարևոր գործոն է:

Չետագոտելով էքսկուրսիաների միջոցով հայրենիքը ճանաչելու ճանապարհը՝ վստահ կարող եմ ասել, որ սովորողի աշխարհայացքի ձևավորման հարցում այն բացառիկ տեղ ունի: Այդ էքսկուրսիաների ընթացքում աշակերտը ճանաչում է իր հայրենիքի ամեն անկյունը, ամեն քար ու թուփ: Հայրենի հողի վրա կառուցված յուրաքանչյուր եկեղեցի իր խորհրդով լցնում է նրա հոգևոր աշխարհը, ամեն տեսարժան վայր դրոշմվում է նրա հոգում և մտքում: Հայրենի բնաշխարհի գեղեցկությունն ու այդ բնաշխարհին ավելի մոտ լինելը օգնում է աշակերտին զգալ գրականության դասին ընթերցած ամեն տաղն ու տողը:

Գրականության ուսուցչի խնդիրներից է սաների հոգում սերմանել սեր դեպի հայրենի բնաշխարհը, դեպի հայրենիքի ամեն անկյունը: Նա պետք է կարողանա անել ամեն բան, որ աշակերտը գիտակցի, որ արժեքների բուրգի գագաթին է գտնվում նվիրական և մեծագույն արժեքի՝ հայրենասիրության զգացում դաստիարակելը:

Հայրենասիրությունը և՛ հայրենի բնաշխարհը ճանաչելն է, և՛ ամեն ճարտարապետական կոթող ճանաչելն է, և՛ հայրենի մշակույթը ճանաչելն է, և՛ ազգային հոգևոր և մշակութային դաստիարակ ունենալն է:

Գրականությունը բացառիկ ձևով է օգնում ճանաչել մեր հայրենիքը: Այն ավելի տպավորիչ և ուսանելի է դառնում, երբ աշակերտը հաճախ է մասնակցում էքսկուրսիաների: Բակունցի և Թումանյանի աշխարհը ճանաչելու լավագույն տարբերակ է լինել նրան հայրենի վայրերում:

Իհարկե, սա հաճախ դժվար է կազմակերպել, սակայն դպրոցը ևս պետք է այս հարցում օգնի ուսուցչին: Աշակերտներին միշտ հաճելի է լինել հայրենիքի տարբեր վայրերում, և ուսուցիչն ու դպրոցն անպայման պետք է օգնեն նրան: Այդ էքսկուրսիաները սովորողի արժեհամակարգում նոր արժեքներ են ձևավորում, նրա մեջ արթնացնում են սեր դեպի հայրենիքը, հայրենասիրական ոգին են բարձրացնում, կարևորում են ազգային արժեքներ, հայ մնալու և Հայաստան աշխարհը պաշտպանելու կարևորությունն են բացահայտում:

Այսօր և հավիտյան հայ ուսուցիչը, հատկապես հայագիտական առարկաներ դասավանդող ուսուցիչը իր արբազան պարտքը պետք է համարի աշակերտի արժեհամակարգում գերագույն տեղում պահել ազգային, հայրենասիրական գաղափարները:

Ինքս անում եմ ամեն բան, որ հայ աշակերտը լավ ճանաչի իր երկիրը, իր ժողովրդին, իր մշակույթը: Էքսկուրսիաները լավագույն միջոցներից են այս խնդրի լուծման համար:

Տվյալների հավաքագրում

Աշակերտների 30%-ը դժվարանում է ինքնուրույն աշխատել, 70%-ը ունի հետաքրքրությունների ավելի լայն շրջանակ և իմ ուղղորդմամբ կարողանում է հասկանալ և ընդունել նոր արժեքներ:

Գրական ցերեկոյթներով հետաքրքրված է աշակերտների 60%-ը, թանգարաններով՝ 30%-ը: Աշակերտների 10%-ը ցանկանում է «Գրականություն» առարկան ուսումնասիրել միայն դասապրոցեսի ընթացքում: Գրականության դասին կիրառվող մեթոդները սիրում է աշակերտների 95%-ը:

Տվյալների վերլուծություն

1. Դասալսումներ այլ ուսուցիչների մոտ:
2. Խմբային քննարկումներ:
3. Վիկտորիաներ, գրական դատեր:
4. ՏՀՏ գործիքների կիրառում:

Եզրակացություն

1. Հետազոտական աշխատանքի արդյունքում ավելի որոշակի և պարզ դարձավ, թե ինչ խնդիրներ են խոչընդոտում առարկան ավելի լիարժեք մատուցելու, աշակերտներին մատչելի դարձնելու համար, ինչ արժեքների վրա է այսօր ձևավորվում անհատը, ինչպես կարող են կրթական ծրագրերը, տարբեր մեթոդներ, միջավայրը ազդել սովորողի արժեհամակարգի ձևավորման վրա:
2. Աշխատանքային գործունեության 19 տարիների ընթացքում (16 տարի Ա. Շիրվանզադեի անվան համար 21 դպրոց, 3 տարի Անտիկյան կրթարան) դիտարկել եմ բազմաթիվ աշակերտների արժեհամակարգեր: Մշտապես գրուցել եմ աշակերտների հետ, ծանոթացել նրանց հետաքրքրություններին և նախասիրություններին, գրուցել նրանց ծնողների հետ, այլ առարկաների ուսուցիչների հետ:
3. Կատարված ուսումնասիրությունները և հետազոտությունները ցույց են տվել, որ սովորողի արժեհամակարգի ձևավորումը «Գրականություն» առարկայի դասավանդման ընթացքում պահանջում է մեծ և խորքային աշխատանք: Այն արդարացված է, քանի որ ակնհայտ են աշակերտի մտածողության, մտածելակերպի, կատարած աշխատանքի լուրջ փոփոխությունները: Սովորողների արժեհամակարգում նման աշխատանք կատարելուց հետո ի հայտ են գալիս նոր և բարձր որակներ, որոնց շնորհիվ նա հասարակության մեջ ավելի մեծ հարգանքի է արժանանում՝ որպես անհատ և քաղաքացի, որպես հայ մարդ:

Բոլոր այն ճանապարհները, որոնք օգնել են այսօրվա աշակերտի մեջ սերմանել բարձր որակներ, նրա աշխարհայացքը դարձնել ավելի լայն, օգնել տեսնելու ճիշտը, բարին, գեղեցիկը, վսեմը, արդարացված են:

Վստահաբար կարող եմ ասել, որ հետազոտական այս աշխատանքը կատարելու ճանապարհին ինքս արել եմ նոր բացահայտումներ և ոգեշնչել շատ աշակերտների:

Օգտագործած գրականության ցանկ

1. Տ. Ազատյան, Յ. Բաբայան «Անչափահաս իրավախախտի հոգեբանություն», Երևան 2021:
2. Բաբանսկի Յու. Կ. , Պոբեդանոսցև Գ. Ա. , «Աշակերտների դաստիարակությանը կոմպլեքսային մոտեցում», Երևան 1987:
3. Հանրակրթության պետական չափորոշիչ:
4. Հակոբյան Ն. Ռ. , Սարգսյան Վ. Ժ. , Արժեքային համակարգի այլափոխումները փոխակերպվող հասարակությունում, «Հոգեբանությունը և կյանքը», 2006 թիվ 12:
5. Аверин В. А., Психология личности, Уч. Пособие, СПб 1999.